

4

DE  
INAVGVRATIONE PRINCIPVM  
SVPER CLYPEO  
DISPVTATIO

---

QVAM

A. D. XXII. SEPTEMBR. A. C. MDCCCXX.

PRAESIDE  
CHRISTIAN. ADOLPH. KLOTZIO


CONSILIAR. REG. INT. PROFESS. PHILOSOPH.  
ET ELOQVENTIAE P. O.

DEFENDET

AVCTOR

IOANNES AVGVSTVS WOHLFAHRT

HALENSIS.



HALAE AD SALAM,

AERE STEPHANIANO.



V I R O

EXCELLENTISSIMO, CONSVLTISSIMO,

DOCTISSIMO

IOANNI IACOBO  
WOHLFAHRT

IVRIS VTRIVSQVE DOCTORI

ET ACAD. CAESAR. NATVR. CVRIOS. SODALI

AVVNCVLO SVMMA PIETATE

COLENDO

HOC  
ACADEMICVM SPECIMEN

D. D. D.

ANIMVM GRATVM TESTATVS DEVMQVE PRECATVS,  
AVT  
EIDEM FAVEAT FAVSTVMQVE IN EVROPAM REDITVM  
E SVRINAMENSI REGIONE CONCÉDAT

IO. AVGVSTVS WOHLFAHRT.



## DE INAVGVRATIONE PRINCIPVM SVPER CLYPEO.



### §. I.

**P**rimum omnium, quibus Francorum historiam illustravit vir plurimarum rerum scientia summaque diligentia olim praeditus, Bernardus Montfaucon, monumento- rum satis memorabilem priscae inaugurationis regum antiquorum imaginem offert dignamque, quae consideretur attentius. Nam nullum, quantum memini, monumentum antiquum huius ritus vestigia exhibet, et imperitia ipsa pictoris animos oculosque nostros aliquamdiu moratur. Illud monumentum quale sit ut cognoscant lectores, repetamus, quia illud descripsit vir olim doctissimus, orationem totam *a*). *In elegantissimo codice Graeco Biblio-*

*a) Monumens de la Monarchie Françoisse. Tom. I. tab. I. Disquisit. praeu. p. 19.*

*Bibliothecae Regiae decimi seculi, ubi David rex promulgatur clipeo superpositus et a suis sustentatus. David clipeo nixus stat a quatuor viris sustentatus. In concava autem clipei facie extremam ille partem occupat, quae ibidem reflectitur. Breuiore indutus est veste, ex pictoris arbitrio facta, ut alia circumstantium omnium vestimenta. Sceptrum eius flore lilii terminatur, qui flores Constantinopoli ad Ornatus varios in usu erant. Multi etiam huiusmodi flores visuntur in plano tecto vicinarum aedium, ubi quidam per fenestras rem, quae agitur, spectant. Flos lilii vnus etiam conspicitur in frontispicio vicini templi. David a iuvene quopiam coronatur. Corona est merus circulus figuris ornatus. Qui coronat illum iuuenis lauro et ipse coronatus est, et circa caput nimbum habet ut et David. Iuuenis autem ipse Corona est, personae more repraesentata: sed quia εἰσφύωνος est generis masculini, ideo ut adolescens exhibetur, secundum morem Graecorum iam a priscis temporibus obseruatum. Omnia quippe personarum more pingebant in statuis anaglyphis et picturis: et si nomen rei, quam personae forma depingere volebant, masculinum esset, illam ut virum repraesentabant: si foemininum, ut foeminam. Haec ille. Vtinam vero copiosius de hac pictura egisset vir doctus atque inprimis commemorasset, quale argumentum contineat ille codex, cuius ornamentum eam esse voluit pictor! Sed iusto breuior fuit cum in hoc tam in altero opere, quo longe plurima antiquitatis monimenta complexus fuit, Montefalconius, quoties de ipsis monumentis loquitur, verbosior saepe praeter necessitatem in argumento illorum explicando.*

## §. II.

Iam vel tacentibus nobis pater, pictorem satis ridiculo errore, quas constantinopoli forte viderat aut ibi obtinuisse audiverat, inaugurandorum principum caerimonias, ad Hebraeos transtulisse. Eiusmodi errores a sculptoribus pictoribusque, aut ignaris priscorum rituum, aut non recordantibus diversam temporum rationem, commissos fuisse saepenumero, sciunt, qui artium historiam cognitam habent. Tribuunt antiquis temporibus arma, vestes, aedes, alia, quae iis plane ignota fuere, longe serius inuenta et cognita. Recte commendavit Io. Schefferus, praeter alia, quae utilissima pictori sunt, artificii vitae humanae usum *b*). „Vfus ait vitae humanae positus est in intellectu rerum, actionum, motuum cuiusque pro ratione temporis, loci, personae, legum, consuetudinum convenientium: ne quid praepostere abhorrensue vel a moribus publicis privatisque pingatur: ut si Romanus in pallio, Graecus in toga, hi imberbes, illi barbati formentur. Consequetur pictor hoc diligenti observatione antiquitatis monumentorum, lapidum, numorum, gemmarum et similium.„ Sed quam pauci fuerunt omni aetate, qui vere gloriari possent, se omnia sic exhibuisse, ut temporum morumque ratio postulare. Nec ipsi quidem antiqui artifices his erroribus immunes esse videntur. Nam in Herculanensium picturarum alia Theseus *c*) annulum habet, in alia legatus Acolorum ad Oeneum, regem Calydoniae, missus,

A 2

annu-

*b*) v. Io. Schefferi *Graphice* p. 108.

*c*) v. *Le Pitture antiche d'Ercolano* Tom. I. tab. V.

annulum, vt solebant legati, praefert *d*), licet Plinius Troiani belli temporibus annullorum vsum nondum cognitum fuisse scribat *e*). Longe vero plura eiusmodi errorum exempla praebent recentiores tabulae. Christum pinxere scamnis insidentem cibumque capientem cum discipulis: testa aedium in Palaestina exhibuerunt acuminata; Christo tribuerunt praecatorias sphaerulas. Exemplà multa collegit Ioannes Molanus, in libro non plane inutili, sed nugaci interdum nec scripto eleganter satis *f*). Neque fuerunt errores vilium quorundam operatorum. Immortales illi viri, quorum ingenia manumque omne aeuum admirabitur, Titianus, Paulus Veronensis, Tintoretus, Sebastianus Riccius, Rembrandus, hanc reprehensionem incurrunt *g*). Quis enim credat, Titianum, duo discipulos, in vico Emaus cum Christo coenantes vestibus indutos, quas qui religionis, caussa peregrinantur inter pontificios gestant, sphaerulasque precatorias praeferentes, stragulas, quibus parietes ornati, Romana aquila insignitas puerique cibum porumque ministrantis pileum cristis decora-

*d*) T. III. tab. XIV.

*e*) Hist. Natur. XXXII, 1.

*f*) *Historia SS. Imaginum*, adde Io. Fabricii *Histor. sacra contra nonnullos pictorum errores vindicata*. Altd. 1684. *Pictor errans in historia sacra*: diff. Philippi Rohr. Lips. 1679. Io. Frieder. Iänger *de inanibus picturis* Lips. 1678. tum Paul Christ. Hilfcher *Errores Pictorum circa natiuitatem Christi*. Lips. 1689. *La Theologie des Peintres, Sculpteurs, Graveurs et Dessinateurs*, par M. l'Abbè Mery. Paris 1765.

*g*) conf. ill. Hagedorn *Betrachtungen über die Malerey* p. 195. sq.



decoratum exhibuisse? Haec tamen Venetiis tabula exstat *b*). Sed de his nolumus plura addere, aut collecta ab aliis repetere. Huius vero generis errorem offert oculis nostris ea quoque, quae disputandi occasionem praebuit, pictura. Nihil enim Iudaeae in ea conuenit, nihil Dauidi, omnia conueniunt Byzantino Imperatori. Nos singulas partes considerabimus.

Ad sceptrum quod attinet, videmus esse scipionem. Duplex sceptrum habuerunt Imperatores Constantinopolitani, crucem et virgam *i*). Nam retinuit sceptrum primam et antiquissimam baculi, virgae, scipionis, quibus summam potestatem indicari cupiebant veteres populi *k*), formam. Imponebantur vero huic scipioni varia ornamenta. Insidebat saepe baculo aquilas *l*): alii praeferebant columbam, alii ciconiam: alii rosam *m*). Media aetas frequenter ornauit sceptrum lilio, atque haec sceptrum in numis conspiciuntur non paucis, etiam Germaniae Imperatorum, Friderici II. Ottonum, aliorum *n*). Cur lilius imposuerint, nolumus curiosius quaerere: sitne spei, an fragilitatis humanae imago. Nota est controuersia de re non

A 3

maximi

*b*) v. Keyßleri *Reifen*. T. I. p. 43.

*i*) v. Goar ad Codinum *de Offic. Constantin.* p. 88.

*k*) cf. Petr. Fabri *Semestr.* l. p. 187. et Salmas. ad Vopisc. Aurel. 13.

*l*) Iunen. *Sat.* X, 43.

*m*) vid. Christian. Godofred. Hofmannum *de origine et iure sceptrorum*. p. 10.

*n*) v. Christ. Schlegelium in *Apotelesm. de numis Abbatum Hersfeldensium* p. 37. et 85.

maximi momenti inter Chiffletium et Tristanum agitata. Plures populi sceptris regum suorum lilium addidere o), nec respexere fortasse quidquam aliud, quam floris amoenitatem. Vnde etiam Prudentius Sapientiae tale sceptrum tribuit p):

*In manibus dominae sceptrum non arte politum,  
Sed ligno viuum viridi est, quod stirpe recisum,  
Quamuis nullus alat terreni cespitis humor,  
Fronde tamen vires incolumi: tum sanguine tinctis  
Intersexa rosis candentia lilia miscet,  
Nescia marcenti florem submittere collo.*

Quis hic mysterii quidquam latere putet? Lili formam referebant candelabra, epistylia, alia, pulchritudinis causa et elegantiae q).

Caput regis ambit circulus, qui dicitur nimbus, quem hoc loco Montefalconium fere silentio praeteriisse miror. Sed alio loco copiosius de illo agit. Nos duo tantum attingemus. Primum male de origine nimbi existimat Scaliger r), cuius sententiam multi secuti fuerunt. Statuarum enim inquit capitibus ab antiquis lunulas additas fuisse, ne foedarentur stercore auium: Christianos, re non satis perspecta, credidisse, honoris causa illas additas esse, atque hinc sanctorum virorum imagines eiusmodi lunulis vel orbibus cinxisse. Quae sane opinio non magis

o) v. Io. Iac. Chiffletii *Lilium Francicum* cap. 12. p. 86.

p) *Psychomach.* v. 878.

q) v. Du Fresne *Constantinopol. christiana.* L. III. p. 52. et *Glossarium med. et inf. Latini.* T. II. p. 300.

r) ad *Catala* p. 210.

gis probabili argumento firmari potest quam eorum sententia, qui quarto seculo circularum horum originem tribuunt. Nam notum est, radiata sibi finxisse veteres capita deorum *s*), deorum diuino hoc splendore collucere putasse. Quare radiata illis capita dederunt, in monimentis, eorum honori et diuinati consecratis. Sic Lucianus de Iunonis signo: καὶ ἐπὶ τῇ κεφαλῇ ἀκτῖνας φέρεται *t*). Nec iis eiusmodi lucidum circulum addidere in statuis tantum, sed, id quod Scaligeri opinioni quam maxime aduersatur, in numis quoque, in picturis, in anaglyphis. Certe inter Herculanenses picturas duas tabulas conspiciamus, in quibus numina apparent, quorum capita orbiculis radiantibus ornata sunt *u*), quae tabulae occasionem dederunt interpretibus, verbosas disputationes amantibus, multa dicendi super hac re. Non vero semper radii additi aut lucidus splendor expressus, sed tanquam illorum indicium orbiculos circulares seu semicirculares exhibuere artifices. Inde multo frequentior vsus est horum circularum, quam nimbi, numine claro collucentis. Cum igitur in numis aliisque monimentis, quibus neque ab auiibus neque a coeli tempestate periculi quidquam esset, hi orbes appareant, quid nisi honorem significant et diuinitatem? Nec deorum capitibus tantum nimbi addebantur, sed, imperio delato summaque potestate ad vnus arbitrium, cum ambitio princi-

pum

*s*) v. Barthium ad *Claudian. IV. Consul. Honor. 27.* . Taubmannum ad *Virgil. Aen. L. III. v. 148.*

*t*) de *dea Syria* cap. 32. p. 478. *ed. Reitz.* adde Hemsterhusium ad *Timonem.* cap. 51. p. 165.

*u*) v. *Le Pitture antiche d'Ercolano* T. II. tab. X. et tab. XVII.

pum sibi diuinos honores et titulos arrogaret atque adulario vilissima ciuium lubenter illos tribueret, etiam hoc iis obrulerunt diuinitatis signum x). Adamauerunt inprimis nimbum Byzantini Imperatores, retinueruntque etiam eo tempore, quo Christianam doctrinam profitebantur, non tanquam diuinitatis, sed tanquam maiestatis, cuius externam speciem captabant audissime, gemmis et vnionibus effusis, nec iis tam ornatis vestibus quam deformatis, indicium. Recte igitur scribit, quod, quia hoc pertinet, repetemus, Montfaucon y): „Nimbum videmus quoque in numis Iustini et Iustiniani, Mauricii item et Phocae, in aliisque posteriorum temporum. In tabulis vero depictis clarius exhibetur. In familiis Byzantinis Cangi nimbus habetur in tabula depicta Eudociae, vxoris Basilii Macedonis, filiorumque eius Alexandri et Leonis p. 139. nec non Romani Diogenis et Eudociae vxoris eius. Codex Graecus Bibliothecae D. Episcopi Metensis Nicephorum Phocam exhibet nimbo ornatum, vt et vxorem eius Mariam. Vno verbo: Constantinopolitani Imperatores nimbo semper capita sua exornarunt vsque ad captam vrbem per Mahometem II. a. 1453.”

Quid dicamus de iuvene, qui coronam regi imponit? Fateor profecto, Montefalconii opinionem paullo coactam mihi videri, nec se probabilitatis specie satis commendare, praesertim cum non recorder, Imperatores Constantinopolitanos sibi ipsos imposuisse coronare. Nam eam interdum senior Imperator collegae,

x) v. Keyßleri *Antiquit. Septentrional.* p. 398. seq.

y) l. c. p. 21.

legae, quem adsciscebat, et Patriarcha, interdum solus Patriarcha imponebat z). In anaglypho, quod triumphum M. Aurelii exhibet, Imperator sedet in curru, et Victoria a tergo stans lauream coronam manu praefert, iamiam illius capiti imponendam a). Sed huc non pertinet hoc monimentum. In numo Imperatoris, Romani Diogenis b), virgo Maria capiti Imperatoris coronam imponit, atque in alio Isaacii Angeli e nube manus exerta imponit coronam capiti Imperatoris c). Quid si Genius Imperatoris fortasse indicatur? Fauere videtur coniecturae seminuda iuuenis species caputque nimbo cinctum. Genio principum tribuebant omnia, quae prospere euenirent et feliciter d), adeoque coronationis partes poterant illi dare. Nec haec superstitio illorum temporum opinioni aduersari videtur. Nam sententiae Graecorum et Romanorum de genio cuique homini tributo Christianorum quoque animos ipsorumque doctorum, qui Patres appellantur, scripta occupauerunt e), id quod fortasse Philosophiae Platonicae debetur, cui horum non pauci plurimum tribuebant. Sed mittamus hoc.

## §. III.

z) v. Codinum *de offic. Constantin.* c. XVII. p. 123.

a) v. Montfaucon *Antiqu. Expliqu.* T. IV. p. 103.

b) v. du Fresne *Famil. August. Byzantin.* p. 159.

c) Ibid. p. 201.

d) v. Ever. *Ottomem de periurio per genium principis* cap. 2. §. 2.

e) vid. Huetium in *Origenianis* L. II. §. 18. seq. Suicerum in *Thesaur. Ecclesiast. voc. ἀγγελος*.

## §. III.

Ad rem ipsam progredimur. Ea de causa picturam, a Montefalconio exhibitam, quae consideretur, dignam censemus, quia caerimoniam offert principum inaugurandorum singularem. Quae licet ab aliquot populis frequentata fuerit, tamen hoc vno in monimento oculis subiicitur. Exhibet vero inaugurationem principis eam, quae fiebat, illo aut stante aut sedente in clypeo, quem sustentabant interdum nonnulli, interdum circumferebant, acclamantibus reliquis faustisque votis et acclamationibus prosequentibus principem. Cuius caerimoniae hanc vim esse voluerunt, ut ostenderent leuatum in altum principem vniuerso populo eique summam rerum potestatem tribui declararent. Non vno a populo neque vno eodemque modo ab iis, qui hanc caerimoniam inaugurandorum principum tenerent, populis hoc agebatur. Diuersitatem quandam apud diuersas gentes animaduertimus. Quare quae cuiusque propria fuerunt, recensebimus.

## §. IV.

Initium faciamus ab aula Constantinopolitana, non quasi antiquissima huius ritus vestigia hic inueniamus, sed quia frequentissimam illius mentionem fieri videmus. Nam Byzantinos Imperatores scuto impositos, leuatosque esse constat. Omnem huius caerimoniae rationem describit Codinus *f*). Posteaquam enim narrauit, Imperatorem publico testimonio professum esse suam de doctrina Christiana veritate persuasionem, ingressumque augustiorem et ampliorem Patriarchii aulam, quae *Θωμάρης* ap-  
pella-

*f) de offic. Constantinop. c. XVI. p. 121.*

pellabatur, ita pergit: Μετὰ δὲ τῷτο ὁ Βασιλεὺς ἐπὶ σκουταρίου καθεστθεὶς ἐπαίρεται εἰς ὕψος καὶ φαίνεται πᾶσι τοῖς κάτωθεν ἰσταμένοις πλήθετιν. κατέχεται δὲ τὰ μὲν ἔμπροσθεν τῆς ἀτπίδος αὐτοῦ τε ὁ Βασιλεὺς καὶ πατὴρ ἀναγορευόμενος, ἐὰν ζῶν ᾖ (al. ἦν) καὶ ὁ Πατριάρχης. Τὰ δὲ ἐκ πλαγίων καὶ ὀπίσθεν οἱ ἐν ἀξιώματι ὑπερέχοντες, ἡγουν Δεσπότες καὶ Σεβαστοκράτορες, ἐὰν ᾧτιν' εἰ δὲ μὴ, οἱ κρίττονες καὶ εὐγενέστεροι τῶν ἀρχόντων· εἰ δ' ἔκ ἐστὶ πατὴρ, τὰ μὲν τῆς ἀτπίδος ἔμπροσθεν ὁ ἐντιμότερος τῶν ἀξιοματικῶν, ἢ τῶν ἀρχόντων μετὰ τοῦ Πατριάρχου (al. ἢ τῶν ἀρχ. τοῦ Πατριάρχου ὄντων μετ' αὐτοῦ) τὰ δὲ γὰρ ὀπίσθαι, οὓς εἶπομεν. Ἐπευφημητάντος δὲ τοῦ λαοῦ καὶ φροσάτου παντός, κατέρχεται μὲν ἀπὸ τοῦ σκουταρίου, ἄγεται δὲ εἰς τὸν τῆς ἀγίας Σοφίας ναόν, ὅπου δεῖ αὐτὸν σεβθῆσθαι. *Posthac nouus Imperator in scuto sessitans, collisur in alium, et ab uniuersa multitudine infra stante conspicitur. Tenent vero priores partes clypei Imperator parensque renunciati, si adhuc sit in uiuis et Patriarcha. partes a latere et retro tenent, qui dignitate praecipua excellunt uidelicet Despotae et Sebastocratores, si fuerint. Sin minus, munus hoc obeunt praestantiores et nobiliores ex proceribus. Si non superest noui Imperatoris pater, anteriores partes clypei tenet excellentior ex illis, qui in dignitate sunt aut aliquis ex proceribus cum Patriarcha (al. aut aliquis ex proceribus Patriarchae, qui sunt cum eo) partes posteriores tenent, quos iam antea commemorauimus. Populo et uniuerso exercitu faustis acclamationibus personante descendit de scuto, inciturque ad sanctae Sophiae templum, in quo coronandus est. Locus sane hic luculentus est, quique nos mirifice iuuat. Videmus nouum Imperatorem ante coronationem in scuto sedentem leuari. Scutum tenent viri emi-*

nentissimae dignitatis; Imperator ipse, Patriarcha, tum Δεσπότης et Σεβαστοκράτορες. Ille titulus, primum Imperatoris Byzantini proprius, deinde dabatur affinibus Imperatorum proximaque necessitudine cum iis coniunctis, atque etiam interdum praecipuis proceribus g): hic, ab Alexio Comneno fratri primum tributus, dignitatem indicabat non exiguam h). Populus faustis acclamationibus sublatum Imperatorem excipit. Quo facto scuto descendit ille corona cingendus. Faustarum illarum acclamationum formulas conseruauere veteres scriptores i): *Dii te seruent! Auguste Constantine, Deus te nobis seruet! vestra salus, nostra salus: vere dicimus, iurati dicimus. Gordianum Caesarem omnes rogamus, Iupiter optime maxime Macrino et Antonino vitam: Antoninum habemus: omnia habemus: Antoninum nobis dii dederunt Patrem: Antoninus dignus imperio!* Et quis enumeret omnes formulas, quas laetitia, amor, admiratio animis hominum expressit? Graecae acclamationis formulam memini me legere illam: Ἀλεξίς καὶ Ἀνδρόνικος μεγάλων Βασιλέων καὶ αὐτοκρατόρων Ῥωμαίων τῶν Κομνηνῶν πολλὰ τὰ ἔτη k).

Non praetereundum est hoc loco, quod video etiam a Iacobo Pontano notatum esse, Codinum maximam partem illius capitis de coronatione Imperatoris sumfisse, verbis quoque non paucis

g) v. du Fresne notas ad *Ioannis Cinnami hist.* p. 468.

h) v. Iac. Goar ad Codin. *de off. Constant.* p. 21.

i) v. Barnab. Briffonium de *Formul. et solennibus. P. R. verbis* L. IV. Sect. 30. et Iacob Pontanum *ad Cantacuzen.* L. I. p. 992.

k) v. Nicetae Choniatae *Imperium Alexii Comneni* cap. 18. p. 174.



paucis repetitis, e Ioannis Cantacuzeni Historia. Hic enim scriptor iunioris Andronici coronationem copiosissime descripsit. Vnde, quae ad nostrum argumentum pertinent, excerpemus A):

Περὶ δευτέραν ὥραν μάλις αὐτῆς ἡμέρας, τῷ μέλλοντος χρισθῆ-  
σεθαι βασιλέως ἐπὶ ἀσπίδος καθεστέντος, ὁ βασιλεὺς καὶ πατὴρ τοῦ  
αἰαγορευομένου, εἶγε περίεσι, καὶ ὁ πατριάρχης, τῶν ἔμπροσθεν με-  
ρῶν ἐπιλαμβανόμενοι τῆς ἀσπίδος, τῶν δ' ἐπιλοίπων οἱ ἐν ἀξιώμασιν  
ὑπερέχοντες δεσπότες τε καὶ Σεβαστοκράτορες, εἴπερ εἰσιν, ἡ δὲ ἐπι-  
φανέσονται μάλις αὐτῶν συγχλητικῶν καὶ μετεωρίζαντε, ὡς ἐνι μάλις  
αὐτὸν ἅμα τῇ ἀσπίδι, τοῖς πληθεσιν ἐπιδεικνύουσι τὸν βασιλεῖα πάν-  
τοθεν περιεσπόμενοις, ἐπευφημησάντων δὲ αὐτῶν, καταθέντες, ἄγουσιν  
εἰς τὸν ναὸν, ἔνθα δεῖ τὴν τελετὴν γενέσθαι. *Sub horam porro diei  
maxime secundam imperatore inungendo super scutum eleuato, im-  
perator parens renuntiati imperatoris, si superest, et Patriarcha,  
anteriora scuti apprehendentes, latera autem et posteriora, quib  
dignitate antistant, despotaе et sebastocratores, si sunt, alioqui  
principum nobilissimi, ipsumque cum scuto in altum, quantum pos-  
sunt, tollentes, undique circumfuso populo ostentant. Post faussam  
ac laetam acclamationem eum daponunt atque in templum, in quo  
solenni risu coronandus est, deducunt.* Mire in omnibus conspi-  
rant conueniuntque hi scriptores, quorum e verbis tota caerimonia,  
quomodo more legeque instituta fuerit, cognoscitur.

Neque solum narratur, quomodo haec res fieri debeat, sed eam quoque factam fuisse eo, quem commemorauere scriptores, modo, certis auctorum testimoniis deprehendimus. Huc

B 3

perti-

1) Cantacuzeni *Histor.* Lib. I. cap. 41. p. 121.

pertinet Georgii Pachymeris narratio, quomodo Palaeologus collega pueri Imperatoris declaratus sit *m*). Nam posteaquam proceres fidei sacramentum fecisse narravit, pergit: καὶ ἔτω τελεσθέντων τῶν ὀρκῶν, ἀσπίδι βασιλικῇ ἐνιζάνει ὁ εἰς τὴν βασιλείαν ἐτοιμαζόμενος. πρῶτον τῷ πόδε τοῖς βασιλικαῖς συμβόλοις ἐναεμοσθεὶς καὶ χερσὶν, ἔνθεν δὲ μεγιστάνων ἀδελφῶν ἀνακτορικοῖς παιάνοις καὶ κρότοις παρὰ πάντων ἐμεγαλύνετο τε καὶ ἐφημίζετο. Sic consummata iuramentorum caerimonia designatus Princeps scuto regio insedit, viroque prius pede imperatoris insignibus ornato; et manibus hinc quidem Antistitum, inde optimatum sublatus acclamationibus et plausu, quibus excipi novi Imperatores solent, ab uniuersis saluatus et Augustus declaratus est. Quo in loco animum aduertit appellatio ἀσπίδος βασιλικῆς. Credo, fuisse inter reliqua κειμήλια clypeum quoque singularem, ornatum egregie, et splendide, quo utebantur in coronando Imperatore. Praeterea discimus hinc, Antistites quoque clypeum, quo Imperator tollebatur, tenuisse. Paucis tantummodo verbis dicit Georgius Acropolita *n*) Theodorum (Lascarim) iisdem caerimoniis inauguratum esse. Nam non opus erat, vt de re fatis tum nota multa diceret. Τὴν νενομισμένην γὰρ ὁρίαν ἀποδοὺς τῷ βασιλεῖ καὶ πατρὶ καὶ καθεστθεὶς ἐπ' ἀσπίδος ὡς ἔθος, καὶ ὑπὸ πάντων φημισθεὶς αὐτοκρατῶρ. Iustis Imperatori et fratri, vii fieri solet, factis et super scutum assidens, vii moris est, ac omnibus Imperator acclamatur. Idem de eodem Nicephorus Gregoras memoriae prodidit *o*): ἀνηγγερεύετο

δ' ὕπερ

*m*) v. Pachymeris *Histor.* L. II. cap. 4. p. 61.

*n*) Acropolitae *Histor.* c. 53. p. 57.

*o*) v. Nicephori *Histor. Byzantin.* L. III. cap. 2. p. 31.

δ' ὕστερον παρ' ἐκόντων τῶν ὑπηκόων ἀπάντων, καθεσθεις ἐπὶ ἀσπίδος κατὰ τὸ ἐν αὐτῇ ἐπικρατῆν ἔθος. *Post eius obitum autem totius populi suffragiis creatus est, in clypeo sedens more tum vsitato, quem ad locum in notis recte obseruat I. Boiuin p), verti rectius debere: more in his vel hac in re vsitato.* Nec ille aliter de Michaelē Palaeologo q); ἐπὶ τῆς ἀσπίδος ἐνταῦθα περὶ τὴν Μαγνητίαν καθίσαντες Μιχαὴλ τὸν Παλαιολόγον ἀναγορεύουσι βασιλέα εἰ δόξη καὶ γένει προύχοντες. *Viri auctoritate et nobilitate praestantes circa Magnesium clypeo imponunt Michaelē Palaeologum et Imperatorem appellant.*

Quae commemorauimus exempla, ea exhibent inaugurationem Imperatorum legitimam, hoc ritu celebratam. Sed hanc caerimoniam milites etiam seditiosos populumque turbulentum adhibuisse relatum legimus. Nam quibus summam potestatem deferre aut in castris aut in vrbe cupidus nouarum rerum populus exercitusque gestiebat, eos quoque clypeo impositos salutabat Imperatores maximisque clamoribus excipiebat. Hoc in magna seditione Constantinopolitana sub Iustiniano accidisse legimus. Zonaras enim narrat: populum Hypatium in Magni Constantini forum duxisse atque clypeo alte sublatum Imperatorem consalutasse r). Ἐντεῦθεν εἰς τὴν Ἀγορὰν διαθέντες ἕτερον Βασιλέα αὐτοῖς ἐβλεψύταντο προχειρίσασθαι, καὶ τίνα συγγενῇ τοῦ Βασιλέως Ἀναστασίου περισχόντες, Ἐπάτιον, πῇ μὲν ἄκοντα, πῇ δὲ καὶ πεπισμέ-

p) p. 750.

q) L. IV. cap. I. p. 45.

r) v. Zonarae Annales l. XIV. cap. VI. p. 62.

πειτμείον εἰς τὸν τεῦ μεγάλου Κωνσταντικοῦ φόρον ἀπάγουσι καὶ ἐπὶ ἀσπίδος αὐτὸς μετάρσιον ἄραντες ἀναγορεύουσι Βασιλέα. Sic milites Germanum, cui Edeffenorum principatus erat commissus, sub Mauritio seditiosi, inuitum renitentemque clypeis sublatum ducem appellant s): ὁ δὲ στρατός — τὸν Γερμανὸν ἄγοντα στρατηγὸν ἀιηγόρευθεν ἐπὶ ἀσπίδος ὑψώσαντες. Nec alio modo in Phoca eligendo se gefsisse milites turbulentos idem Theophanes commemorat s): τὰ πλήθη συναθροισθέντα προβάλλονται "Ἐξαρχον Φωκᾶν τὸν κένταρχον, καὶ ἐπὶ ἀσπίδα τεύτον ὑψώσαντες εὐφήμησαν "Ἐξαρχον. Quocum consentit, qui Phocam scuto alte sublatum gratulationibus profecutos esse milites etiam narrat, Theophylactus Simocatta u): ἐτέραν δὲ καὶ τῇ ἐς ὕψος ἐκκλησίαν πεποιηκότα τὰ πλήθη, ἔξαρχον τὸν ἐκατόνταρχον Φωκᾶν προεσήσαντο· ἐπὶ ἀσπίδος τε εἰς ὕψος ἐξάραντες, εὐφήμην ἐκτόπως τὴν ἀναγόμευσιν.

## §. V.

Luculentas attulimus Graecum scriptorum de hoc ritu narrationes. quem dicunt viri docti Romanis quoque cognitum et vsurpatum fuisse. Equidem non memini, cuiquam Occidentis Imperatorum hoc ritu imperium delatum esse. Nec recordor, exstare quidquam apud veteres scriptores, vnde coniectura nasci possit, clypeo leuatos inaugurasse Imperatores Romanum populum. In Iulio Capitolino tamen huius ritus vestigia sibi reperisse visus

s) v. Theophanis *Chronographia* p. 220.

t) v. Theophan. p. 241.

u) v. Theophylact. *Histor.* L. VIII. c. 7. p. 205.

fus est inprimis P. Pithoeus x). Verba historici haec sunt: *Inter haec Gordianus Caesar sublatus a militibus Imperator est appellatus, id est Augustus y)*, et alio loco: *His actis propere ventum est ad oppidum Tysdrum inuentusque senex venerabilis post iurisdictionem iacens in lectulo; qui circumfusus purpura humi se abiecit ac retredans eleuatus est z)*. Haec ille verba *sublatus* atque *eleuatus* ita interpretatur, vt eum scuto impostum fuisse dicat. Cui sententiae quo minus assentiar variae prohibent causae. Primum nullo alio testimonio cognitum habeo, hunc ritum eo tempore Romanos adhibuisse: tum ipsa illa verba de quacunque eleuatione intelligi possunt. Neque enim clypei scutue mentio fit. Immo vix haec verba illum omissum fuisse probabile est, modo res ipsa postulasset illa. Denique haec fiebant non quiete et tranquille, sed a militibus turbulentis, qui non tam ritum traditum obseruasse, quam quidquid in mentem veniret, egisse videntur. Reuocant, qui aliter sentiunt, huc plerique versum Claudiani a)

— *cum solita miles te voce leuasset,*

atque poetam de sublato in clypeum Honorio locutum esse putant. Sed multo rectius sentit Casp. Barthius b), haec interpretatus

x) v. Pithoei *Aduers. subf.* L. II. cap. 7. p. 419. in *Oper. Sacr. Iurid. Hist. Miscell.* Paris. 1609.

y) in *Maxim. et Balbin.* p. 305.

z) in *Gordian.* p. 277.

a) in *IV. Conf. Honor.* 174.

b) in *Commentar. ad Claudianum* p. 597.

tatus sic: *Cum te Augustum proclamatum salutasset. Non enim de alia leuatione videtur loqui Claudianus, quam qua in Augustum eleuatus est Honorius. Nam ea usurpatio solemnis istius verbi.* Id quod ostendit exemplis auctorum quorundam, qui dicunt, *leuatus est Imperator, leuauit se Eugenius tyrannus,* neque tamen ad istum, de quo nos loquimur, ritum respiciunt. Nec, credo, facile quisquam assentietur Ioanni Sartorio c), qui, cum in eadem sententia sit, huc quoque trahit versum Vigilii d),

*Socii multo gemitu lacrimisue*

*Impositum scuto referunt Pallanta frequentes,*

unicumque dicit hunc honorem fuisse ducum. Immo nunquam credo fuisse hunc singularem ritum, aut cuiusdam dignitatis proprium, sed poetam in carmine narrasse ea, quae in praeliis fieri solent, vbi omni modo consulunt vulneratis milites. Certe apud Lacedaemonios matres clypeum dabant filiis bellum imituri dicebantque, *ἢ ταύτην ἢ ἐνὶ ταύτῃν e).* Atque poetae non raro referri fingunt e pugna vulneratos in clypeo f). Quae cum ita sint, Iulii Capitolini verba sic intelligo, vt potius leuationem per manus indicari existimem. Nam manibus eleuatos fuisse Romanos Imperatores ostendi potest idoneis argumentis. Huc pertinet locus Lampridii de Alexandro Seuero g): *Post hoc cum ingenti gloria et comitante senatu, equestri ord.ne, atque*  
*omni*

c) Io. Sartor. de *Clypeo* p. 27.

d) Aen. XV, 505.

e) v. Meursii *Miscell. Lacon.* L. II. c. 2. p. 97.

f) v. Columnam ad *Ennium* p. 242.

g) in *Alexandr. Seuer.* p. 245.

omni populo circumfusisque undique mulieribus et infantibus, maxime militum coniugibus, pedes Palatium conscendit: cum retro currus triumphalis a quatuor elephantis traheretur. Leuabatur manibus Alexander vixque illi per horas quatuor ambulare permissum est, undique omnibus clamantibus: *Salua Roma, quia saluus Alexander.* Paulo post locum Taciti afferemus, quem nobis, hunc ritum plane incognitum fuisse Romae, existimantibus, fauere putamus.

## §. VI.

Recenseamus alios populos, qui hoc inaugurandorum ritu vti fuerunt. Primi occurrunt *Gothi*. Vitigis rex, declarans, ubi et quomodo fuerit electus, inquit *b)*: *Auctori nostro gratias humillima satisfactione referentes, iudicamus parentes nostros Gothos inter provinciales gladios more maiorum scuto supposito i) regalem nobis contulisse praestante Deo dignitatem.* Sequuntur *Caninesates*. Ii eas regiones, quas hodie Bataui, tenuerunt *k)*. De his Tacitus *l)*: *Erat in Caninesatibus stolidae audaciae Brinnio, claritate natalium insigni: pater eius multa hostilia ausus, Caianarum expeditionum ludibrium impune spreuerat. Igitur ipso rebellis familiae nomine placuit, impostusque scuto, more*

C 2 *gentis*

*b)* v. Cassiodori *Variar.* L. X. 31. p. 351.

*i)* Sic puto legendum. editio, qua vtor, Geneuensis, a. 1650. vitiose exhibet *scutorum*.

*k)* v. Althameri *Commentar. German.* p. 394. Cellarii *Notit. orbis Antiqu.* T. I. p. 355.

*l)* *Histor.* L. IV. c. 14.

*gentis, et sustinentium humeris vibratus dux deligitur.* Non negligenda sunt verba: *more gentis*, nec neglexit ea vir olim acutissimus, Iustus Lipsius *m*). Clare enim indicare videntur, eo tempore hunc morem Romanis ignotum fuisse. Nam cur morem hunc illius gentis proprium esse dixisset Tacitus, si Romani adhibuissent eundem, praesertim in ea narrationis breuitate, quam Tacitus nunquam non amat? Hunc scriptorem, qui nulum verbum, cui non certa vis subesset, posuit, non probabile est, hoc loco ab ingenio suo effecisse. Credo hoc daturum mihi esse quemuis, qui Tacitum legerit, aut vt rectius dicam, qui praestantissimum historicum ita legerit, vt exemplum prudentiae illud legi debet. *Gallia* quoque antiqua huc referenda est. Nam miles sic egit cum Iuliano, quem in Gallia fecit Augustum. *Conclamabatur posthac ex omni parte, nihilominus vno parique nitentibus vniuersis, maximoque contentionis fragore, probro et conuitiis mixto Caesar assentire coactus est. Impositusque scuto pedestri et sublatius eminens, populo silente Augustus renunciatus n*). Nec aliter de hac re Zosimus *o*). Ἐπὶ τὴν ἀντιπὸς μετῴρων ἀγαντες, ἀνέκον σεβαστὸν αὐτοκράτορα. Quartum locum *Francis* dabimus. De quibus iam scripturo mihi, quae mihi ex historiarum monumentis cognita sunt, ecce! offertur a viro eruditissimo et mihi multas ob causas charissimo, Bidermanno, libellus Christiani Gottlieb Schwarzii, Altdorfini olim Pro-

*m*) in notis ad Tacit. p. 398.

*n*) v. Ammian. Marcell. L. XX. c. 4. p. 194. edit. Lugdun. 1591.

*o*) v. Zosimi *Histor.* L. III. c. 9.



Professoris p). In eo equidem, inuitus, fateor, (nam praeter expectationem opinionemque omnem hoc accidit) non solum picturam a Montefalconio datam conspicio, sed ipse quoque se narrat *de antiquo ritu eleuandi principes inaugurandos* a. 1730. libellum Academicum scripsisse. Non huius libelli quisquam mihi in hac vrbe copiam facere potuit, ideoque, quid ab illo dictum aliarumque sit, ignoro. Neque tamen, quae scripsi, delere volui, cum non vano augurio ductus suspicer, alio virum doctum modo hoc argumentum tractasse, speremque arbitros aequos nostro libello post Schwarzianam quoque operam aliquem locum inter libros non plane inutiles daturus esse. Quare pergamus. Quod igitur ad Francos attinet, exstat apud Gregorium Turonensem locus de Chlodoueo, qui posteaquam populo conuocato dixerat q): *Consilium vobis praebeo, si videtur acceptum, conuertimini ad me, ut sub mea sitis defensione*, quid tum accidit? *At illi ista audientes, plaudentes tam parmis quam vocibus eum clypeo cinctum super se regem constituunt.* Clypeos pulsare solebant Galli praelium ineuntes r) atque etiam ab aliis populis alias ob causas scuta hastis allisa fuisse veteres scriptores memoriae prodiderunt s). Idem narrat Gregorius de Siegeber-

C 3

to I.

p) *Erläuterung des Academischen Problematis von der H. Röm. Reichs Erz-Schild-Herrn-Amt* (Alt. 1739.) p. 6. seq.

q) *Histor. Francor.* L. II. c. 40. p. 97. edit. Ruinart.

r) v. *Diodor. Sic.* L. V. p. 352. adde *Stephanium ad Saxonem Grammat.* p. 238.

s) eorum loca collegit Spanhemius ad *Callimach. H. in Del.* v. 36.

to I. t): *Veniente autem illo ad villam, cui nomen est Victoria-cum, collectus est ad eum omnis exercitus impositumque super clypeo regem sibi statuunt.* Denique de Gundoualdo memoriae prodidit u): *Morabatur tunc Mummolus infra muros Auennicae urbis cum Gundoualdo — qui coniunctus cum supradictis Ducibus Lemouicinum accedens Briuam — Curvetium vicum — aduenit: ibique parmae superpositus rex est leuatus. Sed cum tertio cum eodem gyraurent cecidisse fertur, ita, ut vix manibus circumstantium sustinere potuisset.* Haec verba Gregorii, imprimis ea, quae ad intelligendum lapsum Gundoualdi spectant, illustrant verba Aimonii, Monachi Floriacensis x): *Euocatum Gundoualdum, more antiquorum Francorum, regem proclamantes esse suum, eleuauerunt super clypeum. Cumque tertio totum cum eo circummisissent exercitum clypeus repente ruens cum rege vix a terra eleuari potuit.* Hinc discimus, non solum clypeo imposuisse Francos principem nouum, sed circumgestasse eum quoque. Immo forte ipse stetit in clypeo, non sedit, ideoque facilius accidit, de quo loquuntur historici, casus. Atque stetisse interdum in clypeo principem, praeter picturae nostrae non planae contemnendam auctoritatem, indicare etiam videtur *scutum pedestre*, cui impositum fuisse Julianum Ammianus narrat. Nam oquestri multo latius erat scutum pedestre.

Deni-

t) L. IV. cap. 52. p. 194.

u) L. VII. cap. 10. p. 338.

x) v. Aimonii *Histor. Francor.* L. III. c. 62. p. 76. in Pithoei *Hist. Francor. scriptor.* T. III.

Denique *Chazaris*, genti *Bulgariae*, hunc morem cognitum fuisse docet locus *Constantini Porphyrogeniti*, vbi narrat *Arpadem* a *Turcis* principem electum fuisse γ). Ὅν καὶ ἀρχοντα κατὰ τὸ τῶν χαζάρων ἔθος καὶ ζάχανον πεποιήκασι σικώσαντες αὐτὸν εἰς σκευάριον. *Quem etiam solenni Chazarorum morē ac consuetudine in scuto erectum principem fecerunt.* Quo loco *Ζάχανον*, vocem *Illyricam* seu *Slauam* consuetudinem et legem significare docet *Anselmus Bandurius* z). Σικόνειν vero, σικῶνειν, σηκῶνειν, σηκῶν, quod apud *Scholias*ten *Homeri* occurrit quoque, ἐπαείρας, ἐπαείρας, σηκῶτας a), indicat: *Subleuare, erigere, tollere* b).

## §. VII.

Supereſt, vt quaedam addamus de origine huius caerimoniae natalibusque ritus. Quos eſſe reperendos a gentibus, quae armis deditae eſſent, in armis omnia ponerent, nec fere ſine armis quidquam agerent, patet. Inde credo a *Gothis*, antiquis *Galliae* incolis et *Francis* maxime eum ritum frequentatum fuiſſe. Quantum enim *Franci* inprimis tribuerint armis, et quam lubenter iis tanquam instrumentis rei vniuerſae publicae uſi ſint, inde quoque apparet quia ſcutum et haſtam habebant ſignum poteſtatis c). *Rex*, inquit *Gregorius Turonenſis* d), *Guntſchramnus* data

γ) *de admi. iſt. imper.* c. 38. p. 208.

z) *Animadu. ad Constant.* in *Imper. Oriental.* T. II. p. 124.

a) v. *Meurſii Gloſſarium Graeco-Barbar.* p. 499.

b) v. *du Freſne Gloſſar. Med. et Inf. Graecitat.* T. III. p. 1368.

c) *Io. Georg. Eckhart Rerum Francicar.* L. IX. p. 108.

d) *Hiſt. Franc.* L. VII. c. 33. p. 338.

*data in manu regis Childeberti hasta ait hoc est indicium, quod tibi omne regnum tradidi.* Nam hasta regiae maiestatis insigne erat e). De clypeo vero exstat locus memorabilis Ottonis Frisingensis f). *Est autem consuetudinis Regum Francorum, quae et Theutonum, ut quotiescunque ad sumendam imperii coronam militem ad transalpinandum coegerint, in praedicto campo mansorem faciant.* Ibi ligno in altum porrecto scutum suspenditur g). Picturam quoque in qua scutum alte supra solium sedentis ducis affixum depingitur vir doctus commemorat. Quae quum ita essent, non poterant non isti populi clypeum dignum rege suo solum existimare, cui cum imponerent illum, ea in sede collocare videbantur sibi principem, qua nulla illustrior esset. In numis Romanorum Roma ipsa clypeis et armis non raro insidet. Numus familiae, Caeciliae exhibet Romam, alii Honorem esse arbitrantur, tribus clypeis insidentem, hastam ferentem dextra et a Victoria a tergo stante coronatam h). In numo gentis Publiciae Roma etiam tribus clypeis insidet, dextra hastam tenens, sinistra parazonium, coronata a Victoria i). In numo Titi duobus clypeis eadem insidet k); in numo Traiani Victoria super clypeo stans conspicitur l), et in numo gentis Mussidiae apparet Mars, nudus,

e) v. Chiffletii *Anastasis Childeberti Regis* p. 107.

f) *de Gest. Frider. Imp. L. I. c. 12.*

g) v. Gottfr. Wendelini *Leges Salicae illustratae* p. 186.

h) Vaillant *Tbes. Num. Fam. T. I. p. 196.*

i) v. T. II. *Tbesaur. Morell. p. 331.*

k) v. Vaillant *Numism. Imp. Rom. praet. T. II. p. 104.*

l) v. Rubenii *Numism. Arschotan. tab. 35.*

nudus, galeatus, dextra hastam puram, sinistra flagellum tenens, et pede sinistro clypeum calcans *m*). Hunc vero, de quo locuti sumus, ritum in nullo Romano numo contemplamur. Nam, ut iam diximus, ignorauere illum Romani. Sed mirum videri potest, quomodo factum sit, ut Imperatores Byzantini, qui hoc ritu inaugurabantur, nunquam illius imaginem in numis exhibuerint. Hi vero ut ostenderent, se a solo deo supremam auctoritatem nactos, pingi fingique se curabant coronatos a Christo *n*), qui illis coronam crucemue tradit. Saepius diadema quoque eorum capiti imponit virgo deipara. Huc, praeter numos supra commemoratos (p. 9.), pertinent numi Michaelis Ducae, Ioannis, Manuelis *o*). Quod igitur nullo in numo, nullo in anaglypho apparet, hoc exhibet pictura, quae saepissime historiae nostrae lucem affundit. *Inde*, utar enim verbis, quae huc pertinent, viri doctissimi *p*), colligent viri eruditi, quantum ex eiusmodi, quae in veteribus codicibus passim reperiuntur, figuris et quae in aedium sacrarum vestibulis aut alibi prostant, statuis historiae nostrae commodi ac luminis accessurum sit, si eas studiose aere incidi curent, cum ob oculos nobis persaepe proponant, quae legendo apud scripturas vix percipiuntur.

## COROL.

*m*) v. Oisselii *Thesaur. Numism. antiqu.* tab. 39.

*n*) v. Du Fresne *de Inferioris aevi Numism.* Diss. c. 29. p. 23.

*o*) v. Begeri *Thesaur. Brandenburg.* T. II. p. 865. 867 868.

*p*) Du Fresne *Glossar. Med. et inf. Latin.* s. v. *Armigeri* T. I. p. 332.

## COROLLARIA.

- I. Qui Homerum putant belli Troiani historiam in Iliade enarrare voluisse, errant.
- II. Homerus inter philosophos omnis aevi optimos locum tenet praeclarum.
- III. Maiora et plura poetici ingenii vestigia in Georgicis quam in Aeneide observamus.
- IV. Parum consulunt Homerici ingenii honori parumque se aptos carminum iudices ostendunt, qui sententiolis duabus Iliados et Odysseae argumentum totum tanquam fundamento niti putant.
- V. Eloquentiae cum Graecae tum Romanae locus nullus est nec potest esse nisi in libero populo: quique caret libertate frustra de eloquentiae principatu contendet cum Demosthene et Cicerone, populus, licet ingenia non inferiora Graecis et Romanis alat.



VIRO

V I R O  
EXPERIENTISSIMO, AMICISSIMO  
IO. AVGVSTO WOHLFAHRT

S. P. D.

CHRIST. ADOLPH. KLOTZIVS.

*Facile pro ea, quae mihi TECUM est, necessitudine mihi credes, me non, quia mos postulat, sed ex animi sententia TIBI gratulari filium, mira ingenii alacritate praeditum, optimarum artium studiis deditum, honestatis eundem et probitatis studiosissimum. Quantum enim candori, quo profecto excellis, Vir experientissime, tribuam quantumque amem in TE animum, alienum ab istis turpissimis simulandi dissimulandique artibus, in neminem ulla malevolentia suffusum, cuique bene cupientem, cuiusque fortuna laetantem, omnium commodis inferuire gessientem, quantum igitur illum animum amem dici non potest. Nescio quot mihi amicos homines haec ciuitas suo sinu complectatur. Credo esse admodum paucos. Nam frontis serenitati atque verborum blanditiis quis irasca-*

irascatur si me toties deceptum non fidem habere dixerim? TE vero, Vir integerrime, scio mihi amicum esse; scio TIBI iucunda esse omnia, quae mihi laeta eueniant et bona, moleste TE ferre si qua mihi contingant non satis grata; vno verbo, TVI animi candorem cognitum habeo. Quidni igitur lubenter Filium TVVM in lucem publicam producam, cum praesertim is sit, de quo TE bene sperare iubeam? Ardorem, quo iuuenis ad optimarum artium studia fertur, nosti ipse, quotidianus eorum, quae agit, testis, assiduitatem cognoui ego. Nam probauit mihi vehementer diligentiam suam in scholis, quibus interfuit, meis. Quare TE gaudere iubeo, Vir amicissime, hac TVA fortuna, cuius TE olim fructum iucundissimum percepturum esse credo, imo polliceor spondeoque. Non ferculis, non conuiuii magnifico apparatu TE excipiam, non strepitu ambizioso hunc diem celebrabimus. Relinquemus hanc pompam aliis. Res nostras bene agamus, Deo dicamus gratias, pro iis, quae vtrique tribuit, beneficiis, eundemque oremus, ut nobis porro faveat illius providentia. Nostine meliorem, sanctiorem, iucundiorem, qua hunc Filii TVI, imo TVVM, diem celebremus, rationem? Sic igitur agemus.

Scrips. d. 18. Sept. 1770.

